

Na osnovu člana 23. Zakona o mikrokreditnim organizacijama ("Službene novine Federacije BiH", broj 59/06), čl. 4., 9. i 25. Zakona o Agenciji za bankarstvo Federacije BiH ("Službene novine Federacije BiH", br. 9/96, 27/98, 20/00, 45/00, 58/02, 13/03, 19/03, 47/06 i 59/06) i člana 18. Statuta Agencije za bankarstvo Federacije BiH ("Službene novine Federacije BiH", broj 42/04), Upravni odbor Agencije za bankarstvo Federacije BiH, na 31. sjednici održanoj 7. jula 2011. godine, donosi

**ODLUKU
O NAKNADAMA KOJE SE ZA RAD MIKROKREDITNE
ORGANIZACIJE PLAĆAJU AGENCIJI ZA
BANKARSTVO FEDERACIJE BiH**

Član 1.

Ovom odlukom utvrđuje se visina i način plaćanja naknade za nadzor i kontrolu poslovanja mikrokreditnih organizacija (u daljnjem tekstu: MKO), kao i ostale naknade koje MKO i druga pravna i fizička lica plaćaju Agenciji za bankarstvo Federacije BiH (u daljnjem tekstu: FBA).

Član 2.

Upravni/nadzorni odbor i direktor MKO su odgovorni za uredno plaćanje naknade za poslove koje izvrši FBA.

Član 3.

Naknade iz člana 1. ove Odluke naplaćuju se po pojedinim vrstama poslova prema sljedećoj tarifi:

1. Naknade za nadzor i kontrolu poslovanja MKO

- a) linearna godišnja naknada za mikrokreditna društva (u daljnjem tekstu: MKD) u iznosu od 6.000,00 KM, a za mikrokreditne fondacije (u daljnjem tekstu: MKF) 4.000,00 KM, koja se uplaćuje u jednakim tromjesečnim ratama najkasnije do posljednjeg dana tekućeg tromjesečja;
- b) tromjesečni varijabilni dio se utvrđuje u visini od 0,15 promila ukupne aktive bilansa stanja na posljednji dan prethodnog tromjesečja za tekuće tromjesečje, koji se uplaćuje najkasnije do posljednjeg dana tekućeg tromjesečja

2. Naknade za izdavanje dozvola, saglasnosti, odobrenja, potvrda i drugo:

- a) naknada za izdavanje saglasnosti za promjenu organizacionog oblika iz MKO u MKF iznosi 1.000,00 KM;
- b) naknada za osnivanje i rad MKD koje nastaje ulaganjem i prenosom imovine MKF i rad njegovog organizacionog dijela čije je sjedište izvan Bosne i Hercegovine iznosi 5.000,00 KM;
- c) naknada za osnivanje i rad MKD i rad njegovog organizacionog dijela čije je sjedište izvan Bosne i Hercegovine iznosi 3.000,00 KM;
- d) naknada za osnivanje MKF ili osnivanje i rad njenog organizacionog dijela čije je sjedište izvan Bosne i Hercegovine, iznosi 2.000,00 KM;
- e) naknada za izdavanje dozvole za statusnu promjenu MKO iznosi 2.500,00 KM;

- f) naknada za davanje dozvole za osnivanje organizacionih dijelova MKO u Bosni i Hercegovini, iznosi 500,00 KM;
- h) naknada za davanje dozvole za promjenu sjedišta organizacionih dijelova MKO u Bosni i Hercegovini, iznosi 100,00 KM;
- i) naknada za izdavanje saglasnosti na akta MKO iznosi 500,00 KM, a naknada na izmjene i dopune istih iznosi 100,00 KM;
- j) naknada za izdavanje mišljenja, potvrda i ovjera iznosi 50,00 KM, a uplaćuje se na dan izdavanja potvrde ili ovjere od strane FBA;
- k) Odobrenje za izbor nezavisnog vanjskog revizora ne naplaćuje se.

Član 4.

Ukoliko je prihod od naknada koje MKO plaćaju FBA, veći za 10% od rashoda (troškova) za obavljanje nadzora poslovanja MKO, Upravni odbor FBA može donijeti odluku o povratu MKO dijela sredstava ostvarenih po osnovu uplaćenih naknada iz ove odluke.

Član 5.

Danom stupanja na snagu ove odluke prestaje da važi Odluka o naknadama koje mikro kreditne organizacije plaćaju Agenciji za bankarstvo Federacije BiH ("Službene novine Federacije BiH", broj 27/07).

Član 6.

Ova Odluka stupa na snagu osmog dana od dana objavljivanja u "Službenim novinama Federacije BiH".

Broj U.O. - 31-7/11
7. jula 2011. godine
Sarajevo
Predsjednik
Upravnog odbora
Mr. sc. **Haris Ihtijarević**, s. r.